

سن آذربایجان سؤیله

اسماعیل جمیلی

سن آذربایجان سؤیله نه چون آذر به جان اولدون
اونوتدون اؤز درین دردین، یادین دردین آلان اولدون
چتین گونلرده ایرانین بلاسیندا یانان اولدون
وئریب ائولادینی قربان، اؤزون یالقیز قالان اولدون
یاشیل یوردوم باهار ایکن نه ده ن سولدون خزان اولدون
کئچن یوز ایله یوزلر یول دؤیوشدون مین یارا گوردون
دایاندین، سینمادین دؤزدون، وفا ائتدین جفا گوردون
کیمین چکدین بلاسین سن همان یئرده ن بلا گوردون
سویولدون، پای بؤلوش اولدون یاد اللره تالان اولدون
سن آذربایجان سؤیله نه چون آذر به جان اولدون
دؤیوشدون، دوشمنه غالب گلیب مشروطه نی آلدین
قیز، اوغلان قهرمانلارلا آدین دیلده ن دیله سالدین
سونوندا یادلارا اویدون، الی بوش چاره سیز قالدین
بوتون ایرانه باش اولدون اؤزون باشسیز قالان اولدون
سن آذربایجان سؤیله نه چون آذر به جان اولدون
ایگرد ستاریوین قبری ایاق آلتیندا غربتده
آدی سردار ملی دیر ولی بوش سؤزده صحبتده
وطن قوینوندا یاتسایدی یاشاردی اوج عزتده

ایناندین فتنه کار یادی اؤزون قبرین قازان اولدون
سن آذربایجان سؤیله نه چون آذر به جان اولدون
اندیدیر پای بؤلوش مرکز سنین پایین اولوبدور چول
مین ایللر شاه اولساندا، دیلین باغلی اولوبسان قول
نه بین یوخدور دئیم، یوخدور، قوی اولسون ائلرین یوخسول
دویوردون اؤزگه لر قارنین ائوینده آج یاتان اولدون
سن آذربایجان سؤیله نه چون آذر به جان اولدون
سن اؤز فکرینده اولسایدین، بو گون بو گونده اولمازدین
وفا سیز یادلارا خاطر، اؤزون مین درده سالمازدین
کویرین کندلری آباد، سن ویرانه قالمازدین
گلنده هر جفا تیری بیرینجی سن نشان اولدون
سن آذربایجان سؤیله نه چون آذر به جان اولدون
غازان خانلار سراپیدین قوجا شرقین چراغیدین
نظامیلر، فضولیلر، هنر علمین اوجاغیدین
تمدونه تر قیله بیرینجی سن ایاغیدین
یادا وئردین کهر آتین، اؤزون آخسار چاپان اولدون
سن آذربایجان سؤیله نه چون آذر به جان اولدون
گووه ن ائولادینا آنجاق، اؤزون قیل دردینه چاره
کؤنول وئرمه شکر دیللی، هر آن اویناشلی دیلداره
فیریلداقدیر دئسه هر نه بوراخ گنتسین اوزو قاره
جانین قویدون سؤزون اوسته بو یولدا امتحان اولدون
سن آذربایجان سؤیله نه چون آذر به جان اولدون
پریشان سئوگیلی یوردوم سنه قوربان سئو ن جانیم

توکنمز وارلیغیم سن سن، سنینله وار آدیم سانیم
اؤزون چون بیر اؤزون گوستر، دیرلیسین شهرتیم شانیم
گلر آزادلیغین عطری او گون کی سن عیان اولدون
سن آذربایجان بیرده بو خیر ایشده گمان اولدون

<http://www.kitablar.com/>